

Na osnovu člana 19. stav 1. Zakona o Vladi Federacije BiH ("Službene novine Federacije BiH", br. 1/94, 8/95, 58/02, 19/03, 2/06 i 8/06), člana 61. stav 6., člana 78., stav 4., člana 89. stav 2., u vezi člana 88. stav 1. tačka 8., člana 93. stav 6. i člana 110. stav 1. alineja 7. i 9. Zakona o cestama Federacije BiH ("Službene novine Federacije BiH", br. 12/10 i 16/10), Vlada Federacije Bosne i Hercegovine, na 161. sjednici održanoj 20. januara 2011. godine, donosi

UREDBU

O VISINI NAKNADE ZA KORIŠTENJE ZEMLJIŠTA UZ JAVNE PUTEVE

Član 1.

Ovom Uredbom utvrđuje se visina naknade za korištenje zemljišta uz javne puteve, osim autoputeva i brzih puteva Federacije BiH, visina naknade za postavljanje reklamnih znakova u putnom i zaštitnom pojasu javnih puteva i visina naknade u postupku donošenja saglasnosti i odobrenja u zaštitnom putnom pojasu.

Član 2.

Pravna i fizička lica koja koriste putno zemljište radi obavljanja pratećih djelatnosti pružanja usluga vozačima i putnicima, priključke na javne puteve, elektronske, telefonske, antenske priključke, instaliranja uređaja i opreme, građenja komunalnih, vodoprivrednih i drugih objekata (instalacije, cjevovodi i sl.), postavljanje i korištenje reklamnih znakova su obavezni plaćati naknadu upravitelju javnih puteva.

Član 3.

Visina naknade po m² iznosi:

- a) za benzinske pumpe s priključkom 6,00 KM/m²
- b) za sve ostale priključke osim za stambene zgrade 3,00 KM/m²
- c) za autoservise, ugostiteljske i druge slične objekte 3,00 KM/m²

Član 4.

Visina naknade po metru dužnom iznosi:

- a) za telekomunikacijske i električne kablove i slično 1,50 KM/m"
- b) za cjevovode do 200 mm prečnika 2,00 KM/m'
- c) za cjevovode većeg prečnika 3,00 KM/m'

Član 5.

Visina naknade po komadu iznosi:

- a) za elektronske, telefonske i antenske priključke i opremu 500,00 KM/kom.

Član 6.

Visina naknade za postavljanje i korištenje reklamnih znakova na putnom zemljištu, na godišnjem nivou, iznosi:

- a) jednostrani neosvijetljeni reklamni znak 100 KM/m²,
- b) jednostrani osvijetljeni reklamni znak 140 KM/m².

Član 7.

Visina naknade za postavljanje i korištenje reklamnih znakova u zaštitnom pojasu na godišnjem nivou iznosi:

- a) jednostrani neosvijetljeni reklamni znak 40 KM/m²
- b) jednostrani osvijetljeni reklamni znak 60 KM/m².

Član 8.

Visina naknade za dvostrane, višestране reklamne znakove i rotirajuće prizme i sl. određuje se na način što se novčani iznos iz člana 6. i 7. ove Uredbe uveća za 50% po svakoj strani reklamnog znaka.

Član 9.

(1) Visina naknade iz čl. 3., 6., 7. i 8. ove Uredbe usklađuje se zavisno o intenzitetu saobraćaja na putu - PGDP (prosječni godišnji dnevni saobraćaj) za javne puteve:

- a) na kojima je PGDP 3000 do 7000 vozila visina naknade se obračunava u iznosu utvrđenom u članovima 3., 6., 7. i 8. ove Uredbe;
- b) na kojima je PGDP manji od 3000 vozila visina naknade utvrđene u članovima 3., 6., 7. i 8. ove Uredbe se umanjuje za 10 %;
- c) na kojima je PGDP preko 7000 vozila visina naknade iz člana 3., 6., 7. i 8. ove Uredbe se uvećava za 10 % za svakih 1000 vozila PGDP;
- d) na kojima nema podataka o PGDP-u visina naknade se obračunava u iznosu utvrđenom u članovima 3., 6., 7. i 8. ove Uredbe.

(2) Za obračun naknade iz prethodnog stava ovog člana koriste se posljednji službeni podaci o intenzitetu saobraćaja.

Član 10.

Korisnici putnog zemljišta koji imaju zaključen koncesijski ugovor i plaćaju koncesninu, plaćaju samo naknadu iz člana 3., 6., 7. i 8. ove Uredbe koja se ne uvećava po osnovu PGDP iz člana 9. ove Uredbe.

Član 11.

(1) Uklanjanje bespravno postavljenih reklamnih znakova naplaćuje se:

- a) za reklamne znakove do 2 m² 150,00 KM po komadu
- b) za reklamne znakove preko 2 m² 100,00 KM po m²

(2) Troškove uklanjanja bespravno postavljenih reklamnih znakova iz prethodnog stava ovog člana, snosi vlasnik bespravno postavljenih reklamnih znakova.

Član 12.

(1) Pored naknade izčlanova 3., 4., 5., 6., 7. i 8. ove Uredbe, podnositelji zahtjeva plaćaju i troškove administrativnog postupka donošenja rješenja i troškove izlaska na teren stručnih lica nadležnog organa za puteve.

(2) Naknada troškova administrativnog postupka za donošenja rješenja iznosi:

a) Naknada za davanje saglasnosti za lokaciju i izgradnju benzinske pumpe sa priključkom na javni put iznosi 3000,00 KM po zahtjevu,

b) Naknada za davanje saglasnosti za dogradnju postojeće benzinske pumpe iznosi 1.500,00 KM po zahtjevu,

c) Naknada za davanje saglasnosti za lokaciju i izgradnju ostalih poslovnih objekata koji su u funkciji saobraćaja sa priključkom na javni put iznosi 1000,00 KM po zahtjevu,

d) Naknada za davanje saglasnosti za dogradnju postojećih poslovnih objekata koji su u funkciji saobraćaja iznosi 500,00 KM po zahtjevu,

e) Naknada za davanje saglasnosti za lokaciju objekata iznosi 500,00 KM,

f) Naknada za davanje saglasnosti za izgradnju priključaka na javne puteve iznosi 500,00 KM,

g) Naknada za davanje saglasnosti za izgradnju prilaza na javne puteve iznosi 250,00 KM,

h) Naknada za davanje saglasnosti za polaganje infrastrukturnih vodova (vodovod, plinovod, kanalizacija, TK instalacije, elektroinstalacije i slično), kroz trup puta i putne objekte iznosi:

(1) sa prekopom trupa puta 500 KM

(2) sa bušenjem trupa puta 300 KM

(3) ovješnje na objekte ili kroz objekte 500 KM

(4) za elektro, telefonske, antenske priključke, opremu 100 KM i slično

i) Naknada za davanje saglasnosti za polaganje infrastrukturnih vodova (vodovod, plinovod, kanalizacija, TK instalacije, elektroinstalacije i slično), paralelno sa osovnom puta, a pored trupa puta iznosi 500 KM,

j) Naknada za davanje suglasnosti za prelaz dalekovoda iznad javnih puteva iznosi 300 KM,

k) Naknada za davanje suglasnosti za postavljanje reklamnih znakova iznosi 50 KM/kom.

(3) Troškovi izlaska na teren obračunavaju se 40 KM/h; računavajući i vrijeme odlaska na teren i povratka sa terena.

Član 13.

Danom stupanja na snagu ove Uredbe prestaje da važi Odluka o visini i načinu plaćanja naknade za korištenje zemljišta u cestovnom pojasu i drugog zemljišta koje pripada javnim cestama ("Službene novine Federacije BiH", br. 59/06).

Član 14.

Ova Uredba stupa na snagu narednog dana od dana objavljivanja u "Službenim novinama Federacije BiH".

V broj 79/11
20. januara 2011. godine
Sarajevo

Premijer
Mustafa Mujezinović, s. r.